

कलस्सीइ च्वंगु मण्डलीयात पावलं च्वःगु पौ म्हसीका

थ्व पौ पावलं एफिससं पुर्बय् लाःगु एशियाया कलस्सी धाःगु शहरय् च्वंगु मण्डलीयात च्वःगु खः। थ्व मण्डलीयात पावल थःम्हं हे नीस्वना थकूगु मखु, अयसां पावलं जिम्मा कयातःगु मण्डलीत मध्ये थ्व नं छगू खः। वं थःनाप ज्या याइपिं विश्वासीतयत एफिससं अन छवल। अन च्वंगु मण्डलीइ फताहा गुस्तयसं दुहां वयाः परमेश्वरयात म्हसीकेत व धार्थेयागु मुक्ति कायेत मनूतयसं स्वर्गदूततयत पुजा यायेमाः धकाः धयाजुल धयागु खँ पावलं न्यनातःगु खः। उलि जक मखु व फताहा गुस्तयसं म्हय् चिं तये हे माः, अले नसा व मेमेगु खँय् नं व्यवस्थाय् धयातःथें यायेमाः धकाः नं धयाजुल।

पावलं थ्व पौ अज्याःपिं फताहा गुस्तयगु विरोध यायेत हे च्वःगु खः। येशू ख्रीष्टयापाखें जक हे मुक्ति दइ, मेमेगु धार्मिक विश्वास व थितिकृति झीत ख्रीष्टपाखें अलग याइ धयागु हे थ्व पौया मू खँ खः। गथे ख्रीष्टपाखें परमेश्वरं फुक्क सृष्टि यानादीगु खः अथे हे ख्रीष्टपाखें हे वय्कलं फुक्कं थःलिसे मिलय् यानादी। ख्रीष्टलिसे छपें जुयाः जक हे मनूतयसं मुक्ति कायेफत। पावलं पौलय् विश्वासीतयगु चालचलन गथे जुइमाः धकाः नं बांलाक क्यनातःगु दु।

थ्व पौ कलस्सीइ ज्वनावंम्ह तुखिकस खः। व नाप फिलेमोनया दास ओनेसिमस नं वंगु दु।

धलः पौ

न्ह्यखँ १:१-८

ख्रीष्टया स्वभाव व ज्या १:९-२:१९

ख्रीष्टपाखें न्हगु जीवन २:२०-४:६

क्वचाय्कूगु ४:७-१८

कलस्सी

पावलपाखें ज्वजलपा

1 परमेश्वरं हे ख्रीष्ट येशूया प्रेरित यानातःम्ह जि पावल व किजा तिमोथीपाखें

2 कलस्सी च्वंपि ख्रीष्टयात विश्वास यानाच्वंपि परमेश्वरया मनूत फुक्कसितं ज्वजलपा!

झी परमेश्वर बाःया दया माया व शान्ति छिमिके दयेमा।

सुभाय् व प्रार्थना

3 जिमिसं छिमिगु निति प्रार्थना यायेबलय् झी प्रभु येशू ख्रीष्टया बाः परमेश्वरयात न्ह्याबलेँ सुभाय् बियाच्वनागु दु।

4 छाय्धाःसा छिमिसं येशू ख्रीष्टयात विश्वास यानाच्वंगु व परमेश्वरया मनूतय्त दया माया यानाच्वंगु खँ जिमिसं न्यना तयागु दु।

5 छिमिगु निति स्वर्गय् तयादीगु आशाया निति हे विश्वास व माया यानागु खः। अले सत्यगु वचन व भिंगु खँ न्यंकः वयाबलय् छिमिसं अनन्त जीवन दइ धयागु खँय् आशा याःगु दु।

6 गथे छिमिसं सत्य वचन व परमेश्वरयागु धात्थेयागु दया मायायात बांलाक थुइका काल, अथे हे थ्व भिंगु खँ फुक्कभनं न्यनावनाच्वंगु दु। अले थुकि इमिगु नुगलय् बांलाक ज्या यानाच्वंगु दु।

7 थ्व हे वचन छिमिसं जिपि थें ज्याःमह प्रभुया दास इपाफ्रासयापाखें सय्का काःगु दु। व विश्वास याये बहःमह ख्रीष्टया छम्ह दास खः।✱

8 पवित्र आत्मां छिमित बियादीगु मायायागु खँ जिमित वं हे कंगु खः।

9 थ्व खँ न्यंसांनिसें पवित्र आत्मायागु बुद्धिं छिमिसं परमेश्वरयागु इच्छा बांलाक सीके थुइके फयेमा धकाः जिमिसं प्रार्थना याना वयाच्वनागु दु।

10 प्रभुयात यःकथं याना जुयाः छिमिसं वयकःयात लयतायकेमा, भिंगु बांलाःगु ज्या यानाच्वने फयेमा, अले परमेश्वरयात अज्ज बांलाक म्हसीकाः वने फयेमा,

11 वयकःयागु तसकं तःधंगु शक्तिं छिमित बल्लाकादीमा, अले छिमिसं न्ह्यागु खँय् लयतातां सहयाना च्वने फयेमा धकाः जिमिसं प्रार्थना यानाच्वनागु दु।

12 परमेश्वरयात दुनुगलंनिसें सुभाय् ब्यु, छाय्धाःसा वयकलं थः मनूतय्त तयादीगु जःयागु राज्यय् छिमित नं दुथ्याकादीगु दु।

13 वयकलं हे झीत शैतानयागु खिउँगु राज्यं लिगनाः थः यःमह काय्यागु राज्यय् हयादिल।

14 वयकःया काय्यं हे झीत पाप क्षमा यानाः छुत्कारा बियादिल।✱

दकलय् तःधंमह ख्रीष्ट

15 येशू ख्रीष्ट हे खने मदुम्ह परमेश्वरयागु
खनेदुगु रूप खः।

वय्कः थ्व संसार हे सृष्टि
मयाःनिबलय् निसें दुम्ह खः।

16 छाय्धाःसा परमेश्वरं वय्कःयापाखें
स्वर्ग व पृथ्वीइ दुगु फुक्कं,
खनेदुगु, खने मदुगु,

अले फुक्क शक्ति, राज्य व अधिकार
दय्कादीगु खः।

अले थ्व फुक्कं वय्कःया निती हे
दय्कादीगु खः।

17 वय्कः सृष्टि मयाःनिबलय् निसें
दीम्ह खः।

अले फुक्क वय्कःयागु हे
लिधंसाय् च्वनाच्चंगु दु।

18 मण्डली वय्कःयागु म्ह खः,
अले वय्कः मण्डलीयागु छयं खः।

वय्कः हे दकलय् न्हापा दुम्ह,
अले दकलय् न्हापां
सिनाः म्वानावःम्ह खः।

वय्कःयात फुक्कसियां
प्रभु यायेत थथे यानादीगु खः।*

19 वय्कःयागु थःगु फुक्क स्वभाव
ख्रीष्टयाके दुगुलि परमेश्वर लयतायादिल।

20 परमेश्वरं सृष्टि यानातःगु स्वर्ग
व पृथ्वीइ च्वंगु फुक्कं
वय्कःया कायनं क्रूसय् हाय्कूगु हिं
थःलिसे मिलय् यानादिल।*

21 छिपिं न न्हापा मभिगु ज्याखँय् जुयाः परमेश्वर नाप तापानाः वय्कःया शत्रु जुयाच्चंगु खः।

22 तर आः वय्कःया काय्न् थः हे सिनाः छिमित हाकनं वय्कः नाप मिलय् यानादीगु दु। वय्कः छिमित थःगु न्ह्यःने पवित्र, शूद्र व दोष मदुपिं यायेत हे थथे सिनादीगु खः।

23 उकिं छिमिसं भिंगु खँयागु आशा मत्वःतुसे दुनुगलानिसें क्वातुकु विश्वास याना च्वँ। थ्व हे भिंगु खँ संसारय् च्वंपिं फुक्कसितं न्यंकूगु दु। थ्व ज्याय् प्रभुं जि पावलयात च्यः यानादीगु खः।

मण्डलीयागु निंति पावलं याःगु ज्या

24 छिमिगु निंति थथे दुःखसिया च्वने दुगुलिं जितः तसकं लयता वः। ख्रीष्टयागु म्ह मण्डलीयागु निंति फये मानिगु वय्कःयागु दुःख जिं थःगु म्हय् फयाः पूर्वके।

25 परमेश्वरं हे जितः वय्कःयागु वचन छिमित स्यनेकने यायेत मण्डलीया च्यः यानादिल।

26 न्हापानिसें सुनानं थुइके मफुगु थ्व गुप्ति खँयात आः ख्रीष्ट येशूया पवित्र मनूतय्त ध्वाथुइकादिल।

27 थथे व गुप्ति खँ मनूतय्त ध्वाथुइकादीगु परमेश्वरया ग्वासाः खः। अले गुप्ति खँ थ्व हे खः - “ख्रीष्ट छिपिं यहूदीमखुपिन्के नं दी। अले परमेश्वरलिसे छिपिं नं तःधनी।”

28 उकिं जिमिसं फुक्कसितं ख्रीष्टयागु खँ न्यंका जुयागु खः। फुक्कसितं ख्रीष्टयात क्वातुकु विश्वास याकाः परमेश्वरया न्ह्यःने यंकेत जिमिसं ख्याच्चः बिया अले स्यनेकने यानाः वयाच्चनागु दु।

29 ख्रीष्ट येशू बियादीगु तःधंगु शक्तिं हे जिं थथे दुःख सियाः थ्व ज्या यानाच्चना।

2

1 अयजूगुलि छिमिगु निंति, लाउडिकियाय् च्वंपिनिगु निंति व जिगु ख्वाः तकं मखनिपिनिगु निंति जिं गुलि दुःखकष्ट सियाः ज्या यानाच्चनागु दु धकाः छिमित कने।

2 छिमित साहस दयेमा, अले थःथवय् माया यानाच्चनेमा धकाः जिं थथे यानाच्चनागु खः। अले छिमिसं फुक्क खँ ध्वाथुइके फइ। थुकथं छिमिसं परमेश्वरयागु गुप्ति खँ ख्रीष्टयात नं बांलाक म्हसीके फइ।

3 परमेश्वरयागु ज्ञान व बुद्धियागु धुकू हे वय्कः खः।

4 अयजूगुलि जिं छिमित धाये — न्ह्याक्व हे बांलाःसां मभिंगु खं तापाक हे च्वँ।
 5 म्ह तापाःसां जिगु नुगः ला छिमिथाय् हे दु। छिमिसं ख्रीष्टयात दुनुगलंनिसें
 क्वातुक विश्वास यानाच्चंगुलि जि तसकं लयताः।

ख्रीष्टपाखें जक ब्वलने फइ

6 गथे ख्रीष्ट येशूयात छिमिसं “प्रभु” धकाः मानय् यात, अथे हे वय्कलं धयादी
 थें याना च्वँ।

7 वय्कःयाके हा कयाः ब्वलना च्वँ। अले छिमिसं वय्कःयात हे थःगु जग
 भाःपियाः छिमित स्यनातःथें विश्वासय् क्वातुक च्वनाः न्ह्याबलें सुभाय् बिया च्वँ।

8 होश यानाच्चँ। मखुसा मनूतयगु ज्ञान व बुद्धियागु फयरां खं छिमित स्यंकी।
 थज्याःगु खँ ख्रीष्टपाखें वःगु मखु, बरु मनूतयगु हे थितिकुति व संसारयापाखें वःगु
 खः।

9 गथे परमेश्वर खः, अथे हे ख्रीष्ट नं खः।

10 वय्कःपाखें हे छिपि बांलाक ब्वलंगु दु। वय्कः फुक्क राज्य व शक्ति स्वयाः
 तःधं।

11 छिमिसं ख्रीष्टयात विश्वास यानाच्चंगु हे धात्थें म्हय् चिं तःगु खः। थ्व चिं
 मनूतयगु ल्हातं तःगु मखु, बरु पापं लिफयाइगु ख्रीष्टयागु हे चिं खः।

12 बाप्तिस्मा काःबलय् छिमिसं थःत वय्कःनापं तुं थुन। अले सीम्ह ख्रीष्टयात
 म्वाकादीम्ह परमेश्वरयागु शक्तियात विश्वास याःगुलि वय्कः नाप तुं हानं म्वानावःगु
 दु।*

13 न्हापा पाप यानाच्चंगुलि व व्यवस्था मानय् मयाइपि यहूदीमखुपि जूगुलि
 छिपिं सीपिं थें जुयाच्चंगु खः। आः धाःसा परमेश्वरं छिमित ख्रीष्टनापं तुं म्वाकादीगु
 दु। अले छिमिगु पाप फुक्कं क्षमा यानादीगु दु।*

14 वय्कलं व्यवस्थाय् च्वयातःगु झीत मल्वःगु खँत फुक्कं हुयाछ्ववयादीगु दु।
 वय्कलं थज्याःगु खँयात क्रूसय् नकिं तानादी धुंकल।*

15 थ्व हे क्रूसय् वय्कलं शैतानयागु राज्य व शक्तियात त्याकाः क्यनादिल।

16 उकिं आः सुनानं नयेत्वनेगु खँय्, नखःचखः मानय् यायेगु खँय्, अले अमै,
 पुन्हे व किश्रामबार मानय् यायेगु ला कि मयायेगु धयागु खँय् नियम दयके मते।*

17 थ्व फुक्क लिपा जुइगु खँयागु किपालु जक खः। धात्थेंयागु ला ख्रीष्ट हे
 खः।

☆ 2:12 २:१२ रोम ६:४ ☆ 2:13 २:१३ एफि २:१-५ ☆ 2:14 २:१४ एफि २:१५ ☆ 2:16
 २:१६ रोम १४:१-६

18 “जिमिसं दर्शन खनागु दु” धका: थथ:म्हं त:धना: स्वर्गदूतयात पुजा यानाजुइपि नं दु। थज्या:पिन्सं म्वा:मदुगु खँय् लाका: छिमित थ:म्हं काये दइगु सिरपा: काये मखंका बी। थ:म्हं मस्यूगु खँय् नं थुपि त:धना जुइ।

19 थुमिसं ख्रीष्टयात क्वात्तुक ज्वनी मखु, गुम्ह मण्डलीया छयं ख:। छेनं याना: हे फुक्क म्हब्ब मिलय् जुइ फइ, अले म्ह छम्हं स्वाना च्वने फइ। अले जक परमेश्वरया य:कथं म्ह थाहां वये फइ।☆

ख्रीष्टनाप सीगु, ख्रीष्टनाप म्वायेगु

20 ख्रीष्टनापं तुं सिना: छिपि संसारयागु थितिकुति तापाय् धुंकूगु दु। छिमिसं हानं छाया संसारयागु नियम मानय् यानाच्वनागु?

21 “थ्व काये मज्यु, थ्व नये मज्यु, थ्व थीमज्यु” धका: छिमिसं छाया मानय् यानाच्वनागु?

22 थ्व फुक्कं छयलेवं मदयावनीगु ख:। थ्व ला मनूतयसं हे दयकात:गु ख:।

23 इमिसं स्वयेबलय् स्वर्गदूततयत पुजा यायेगु, थ:गु म्हयात दु:ख बीगु, व चिधं जुइगु गुलि नं त:धं थें च्वं। थथे यायेवं मनूतयसं थ:गु मभिगु मतिइ भिंके फइ मखु।

3

1 छिपि नं ख्रीष्टनाप तुं म्वाना व:गुलि छिमिसं स्वर्गयागु खँय् जक मन ति। अन स्वर्गय् येशू ख्रीष्ट परमेश्वरया जवय् च्वनादीगु दु।☆

2 संसारयागु ज्याखँय् मन तया जुइ मते। बरु स्वर्गयागु खँय् जक मन तया च्वँ।

3 छायाधा:सा छिपि सी धुंकूपि ख:। अयनं परमेश्वरं छिमित ख्रीष्टलिसे म्वाकात:गु दु।

4 ख्रीष्ट हे छिमिगु जीवन ख:। वय्क: झाइबलय् छिपि नं वय्क:नापं तुं खने दइ, अले त:धनी।

पुलांगु व न्हगु जीवन

5 अस्यजूगुलि संसारयागु ज्याखं छिमिसं थ:त क:घाना च्वँ। व्यभिचार याये मते, मभिगु ज्याखँ याये मते, ला: ला: थें सना जुइ मते, मभिगु मतिइ तया जुइ मते, कर्पिनिगुली मिखा वंके मते, गुगु मूर्ति पुजा यायेगु ति हे ग्यं।

6 थज्या:गु खं याना: हे परमेश्वरं धा:थें मयाइपिन्सं वय्क:यागु तं फयेमाली।

7 छिपि नं न्हापा थथे हे यानाजुइपि ख:।

8 आर्वनिसें छिमिसं तं व ल्वापुख्यापु त्वःताछ्व – कर्पिन्त स्यंका जुइगु, कर्पिन्त मभिंकाः खँ ल्हायेगु, अस्यः खँ ल्हायेगु – थज्याःगु ज्याखँ नं त्वःताछ्व।

9 छिमिसं आः पुलांगु चालचलन त्वःते धुंकूगुलि थःथवय् मखुगु खँ ल्हायेगु याये मते।☆

10 छिपिं आः न्हिपिं जुइ धुंकल। आर्वलि वयकःयात बांलाक म्हसीके फयेमा धकाः परमेश्वरं छिमित थःथें हे यानाः न्ह्याबलें न्हकथं हिलादी।☆

11 यहदीमखुपिं जुइमा, यहदी जुइमा, म्हय् चिं तःपिं जुइमा, मतःपिं जुइमा, सःस्युपिं जुइमा, छुं मस्युपिं जुइमा, अले दास जुइमा, दासमखुपिं जुइमा, फुक्कं उथें खः। सकसिकें ख्रीष्ट दी। ख्रीष्ट हे फुक्कं खः।

12 छिपिं परमेश्वरं ल्ययातःपिं पवित्रपिं व वयकःया यःपिं मनूत खः। उकिं छिमिसं दया माया यायेगु, क्वमिलु जुइगु, स्वजा जुइगु, सह यानाच्च्वनेगु यायेमाः।

13 थःथवय् सह यानाः दया माया या। थःत सुनानं मभिंकूसां वयात क्षमा बीगु या। गथे प्रभुं छिमित क्षमा यानादिल, अथे हे छिमिसं नं क्षमा बीमाः।☆☆

14 थ्व स्वयाः तःधंगु ला थःथवय् माया यानाच्च्वनेगु हे खः। थ्व हे मायां छिपिं फुक्कसित छप्पें व छधीं याना तइ।

15 ख्रीष्टयागु शान्ति छिमिगु नुगः जायाच्च्वनेमा। थ्व हे शान्तियागु लागि परमेश्वरं छिमित सःताः छम्ह हे यानादीगु खः। परमेश्वरयात सुभाय् ब्यु।

16 ख्रीष्टयागु वचनं छिमिगु नुगः जायाच्च्वनेमा। छिमिसं थःथवय् स्यनेकने यानाः दुनुगलानिसें भजन व म्ये हालाः परमेश्वरयात तःधंकि।☆

17 छिमिसं न्ह्यागु याःसां, न्ह्यागु धाःसां प्रभु येशूयागु नामं या, अले वयकःया नामं परमेश्वर बाःयात सुभाय् ब्यु।

छेंय् च्वपिन्सं यायेमाःगु हनाबना

एफि ५:२१-३३, १ पत्र ३:१-७

18 मिसातय्सं थः भाःतं धाःथें यायेमाः। थथे याइगु प्रभुयात यः।☆

19 मिजंतय्सं नं थः कलाःयात माया यायेमाः। इमित दुःख बी मज्यु।☆

20 अथे हे काय् म्हाय्यपिन्सं नं थः मांबौयागु खँ न्यनेमाः, अले हनाबना तयेमाः।☆

☆ 3:9 ३:१९ एफि ४:२२ ☆ 3:10 ३:१० उत १:२६; एफि ४:२४ ☆ 3:13 ३:१२-१३ एफि ४:२

☆ 3:13 ३:१३ एफि ४:३२ ☆ 3:16 ३:१६ एफि ५:१९-२० ☆ 3:18 ३:१८ एफि ५:२२; १ पत्र ३:१

☆ 3:19 ३:१९ एफि ५:२५; १ पत्र ३:७ ☆ 3:20 ३:२० एफि ६:१

21 बौपिन्सं नं काय् म्हाय्पिन्त तं चाय्के मज्यु। मख्बुसा इमिगु साहस हे मदयावनी।*

22 दासं थः मालिकं धाःगु खँ न्यनेमाः। मालिकयात लय्ताय्केत न्हाःने जक ज्या याना क्यनेगु मख्बु, बरु परमेश्वरयात लय्ताय्केत दुनुगलंनिसें ज्या यायेमाः।

23 न्हागु याःसां मनूतयगु नितिं मख्बु, बरु प्रभुयागु नितिं यानाच्चवना धकाः मतिइ तयाः दुनुगलंनिसें यायेमाः।

24 छायाःसा छिमिसं प्रभुं बी धयादीगु सिरपाः छिमित दइ धकाः सि हे स्यू। प्रभु येशू ख्रीष्ट हे छिमि मालिक खः।

25 मभिंगु बांमलाःगु ज्या याना जूपिन्त सजाँय बी। प्रभुं ख्वाः स्वयाः न्याय यानादी मख्बु।**

4

1 मालिकतयसं नं दासयागु भिं स्वयेमाः। छिमिसं नं स्वर्गय् थः मालिक दु धयागु खँ ल्वःमंके मते।*

मेमेगु अतीं

2 छिमिसं प्रार्थना यायेगु गुबलें त्वःते मते। म्हतुं जक प्रार्थना यायेगु मख्बु, दुनुगलंनिसें परमेश्वरयात सुभाय् बियाः प्रार्थना यायेमाः।

3 जिमिगु नितिं नं प्रार्थना या। ख्रीष्टयागु खँ कनेत व परमेश्वरयागु वचन न्यंकेत वयकलं न्हाथासं लँ चायेकादीमा धकाः प्रार्थना या। थुकियागु नितिं हे जिं थथे इयालखानाय् कुंका च्वनेमाल।

4 जिं गुकथं थुइके माःगु खः उकथं हे मेपिन्त थुइके फयेमा धकाः छिमिसं जिगु नितिं प्रार्थना यानाब्यु।

5 विश्वासी मख्बुपिलिसे खँ ल्हायेबलय् छिमिसं बांलाक बिचाः यानाः नवा। अले इमित भिगु खँ न्यंकेगु मौका त्वःफिके मते।*

6 चिं सवा ब्यू थें खँ ल्हायेबलय् नाइक व यइपुसे च्वंक नवा। अले कथंहंक लिसः बीगु या।

बिदा काःगु

* 3:21 ३:२१ एफि ६:४ * 3:25 ३:२२-२५ एफि ६:५-८ * 3:25 ३:२५ व्य १०:१७; एफि ६:९

* 4:1 ४:१ एफि ६:९ * 4:5 ४:५ एफि ५:१६

7 यःम्ह किजा तुखिकसं हे छिमित जिगु खँ फुक्क कनी। व नं जिपिं नाप ज्या यानाच्चंम्ह विश्वास याये बहःम्ह प्रभुया दास खः।☆

8 छिमिसं जिगु खँ सीके फयेमा, अले छिमित साहस दयेमा धकाः जिं वयात छिमिथाय् छवया हयाच्चनागु दु।☆

9 अले हानं छिमिथाय् हे च्वंम्ह यःम्ह किजा ओनेसिमसयात नं व नाप छवया हयेत्यनागु दु। ओनेसिमस तसकं विश्वास याये बहःम्ह मनू खः। इमिसं हे छिमित थन जुयाच्चंगु फुक्क खँ कनी।☆

10 जिनापं इयालाखानाय् कुनातःम्ह अरिस्ताखँसं नं छिमित ज्वजलपा धयाहःगु दु। अथे हे बारनाबासया किजा मर्कूसं नं छिमित ज्वजलपा धयाहःगु दु। वयागु खँ ला छिमित न्हापा हे धायेधुन। व वल धाःसा छिमिसं वयात दुनुगलनिसें लसकुस या।☆

11 युस्तस धाःम्ह येशू नं छिमित ज्वजलपा धयाहःगु दु। परमेश्वरयागु राज्ययागु भिंगु खँ न्येकेगु ज्याय् जि नाप जुयाच्चंपि यहदीत थ्व हे स्वम्ह जक खः। थुमिसं जितः यक्व तिबः बियाच्चंगु दु।

12 छिमिथाय् हे च्वंम्ह ख्रीष्ट येशूया मेम्ह दास इपाफ्रासं नं छिमित ज्वजलपा धयाहःगु दु। छिमिसं क्वातुक विश्वास यानाः परमेश्वरयात यःकथं जक यानाच्चने फयेमा धकाः वं छिमिगु निति न्हाबलें प्रार्थना यानाच्चंगु दु।☆

13 छिमिगु निति, लाउडिकियाय् च्वंपिनिगु निति व हिरापोलिसय् च्वंपिनिगु निति वं तसकं दुःख सियाः प्रार्थना यानाच्चंगु दु धकाः जिं स्यू।

14 झी यःम्ह डाक्टर लूका व डेमासं छिमित ज्वजलपा धयाहःगु दु।☆

15 लाउडिकियाय् च्वंपि दाजुकिजापिन्त, अले नुम्फास व वया छैय् मुं वइपिं दाजुकिजापिन्त जिं ज्वजलपा धयाहःगु दु धकाः धयाब्यु।

16 थ्व पौ छिमिसं ब्वने धुंकाः लाउडिकियाय् च्वंपिं विश्वासीतयत नं ब्वंकि। अले लाउडिकियाय् च्वंगु मण्डलीयात च्वयाहयागु पौ नं छिमिसं ब्वं।

17 अर्खिप्पसयात प्रभुं याकेब्युगु ज्या बांलाक मन तयाः या धकाः धयाब्यु।☆

18 जि पावलं थःगु हे ल्हातं छिमित ज्वजलपा च्वयाच्चनागु दु।

जि इयालखानाय् लानाच्चंगु खँ छिमिसं ल्वःमंके मते।

☆ 4:7 ४:७ प्रे २०:४; २ तिमो ४:१२ ☆ 4:8 ४:७-८ एफि ६:२१-२२ ☆ 4:9 ४:९ फिले १०-१२

☆ 4:10 ४:१० प्रे १९:२९; २७:२; फिले २४; प्रे १२:१२,२५; १३:१३; १५:३७-३९ ☆ 4:12 ४:१२ कल १:७;

फिले २३ ☆ 4:14 ४:१४ २ तिमो ४:१०,११; फिले २४ ☆ 4:17 ४:१७ फिले २

परमेश्वरं छिमित दया माया यानादीमा।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7